



Melchior ex Hochstadio Danubiano oppido mortuus, à pueris operam literis dedit, et medio crem literarum sibi cognitionem acquisiuit. Is cum adoleuisset, Regij fontis monasterium petijt, & Cisterciensem S. Bernardi ordinem assumpsit. Situm est illud monasterium in Sueuia Cõstantiensis diocœsis, duobus miliaribus supra Giengam oppidum Imperiale, atq; tribus à Nordlinga in Brentiana ualle. Fundatum erat in honorem Beatæ uirginis Mariæ, & S. Bernardi, anno millesimo trecentesimo tertio, ab Alberto Imperatore, Rhodolphi Habsburgij filio, & Elisabetha eius uxore. Tum etiam Henricus de Salē uel Salomonis uilla assum-

ptus, primus ibi abbas constitutus. In eo loco cum Melchior aliquandiu modestè uixisset, anno demum 1513 abbas decimus septimus electus est. Eam functionem is probè administrauit, literarum studia promouit, monasterium suum restaurauit, & ustrinas cœnobio uicinas ad Brentianum fontem construxit, in quibus miro labore & artificio ferreæ fornaces parari solent. Cum hoc modo magna dexteritate rebus ibi præesset, Leo pontifex ei pontificalia ornamenta concessit, atq; ipsum primū eius loci infulatum abbatem cõstituit. Tandem is anno reparatæ salutis millesimo quingentesimo trigesimo nono senex obiit, atq; in templi choro honorificè sepultus fuit, cum tali memorabili Epigrammate.